

翁

山

詩

外

番禺

茗南

雜體一

上瀧謠

四解

寧上三峽莫上六瀧上瀧猶可下瀧殺我船隨
飛流入于瀧湫千尺之勢十沉一浮篙直如箭
船石不見篙曲如弓船石相舂上瀧船單下瀧
船雙六瀧可過一石不容

上灘謠

三解

一灘一尺十灘一丈高高不窮灘在天上朝上
鳥蠻暮上鳥蠻一灘十日我髮將斑婦人撐右

丈夫撐左估客笑人眠篙不可

舟子謠

四解

廣州大艨艟使得兩頭風輪一篷羸一篷後八
字風揚篷當中前八字風勾篷西東上灘如天
鐵人紙船人與石鬪十鈎一牽船隨石轉其軟如
綿江海無津鐵船紙人隨風所督萬斛埃塵其
船堅重鐵力爲身

上三峽謠

潮上

飛來一宿卽迴飛來潮上二禺皆響

自英德下峽者先湏陽自清遠上峽者先中
宿歌曰

滇陽頭中宿尾中央一峽香鑪是
頭中宿尾滇陽香鑪一峽是中央

英德灘謠

舟上龍頭一沉一浮舟上鼉背一進一退

磨刀灘謠

石爲刀舟爲礪朝磨暮磨人與之敝
舟石相磨舟柰石何

彈子磯謠

一篙一尺十篙一丈不怕彈子磯高高在天上
上水船撐得鐵牆穿下水舟搖得鐵牆浮

望夫操

有序

中宿峽中有望夫臺亦曰望夫山予爲琴操以
擬楊廉夫石婦操云

望夫臺儂今化爲石郎且不須迴
望夫山儂雖化爲石猶自待郎還

雷女織葛歌

雷女采葛緝作黃絲東家爲綌西家爲絺夫寒衣
葛布婦饑食葛乳得錢雖則多不足償租賦一日
織一疋十指徒苦辛祇以肥商賈無能養一身

楓人歌

小雨楓人長一尺大雨楓人長一丈女巫取得沉
水薰一夕楓人有精爽大婦持珠來求子步遲迴

小婦持錢至問郎歸尚未

留人石詛祝辭

有序

自橫州伶俐水口以上江之南岸有一石狀若女子號留人石諺曰廣西有一留人石廣東有一望夫山是也廣東商賈多贅於廣西不返其婦女輒以此石能留人西望詛祝予代爲之辭詛曰

留人石莫留人風吹石化爲塵

祝曰

留人石旣爲塵望夫石復爲人

浮丘謠

浮丘叔浮丘丈人同一目撒豆成金人不知肩上
珊瑚檐一束

花燕謠

有序

雷州西湖每夜有紫燕數萬宿荷花中人呼爲
花燕

燕燕燕飛入荷花尋不見荷花落盡燕無依歸去
猶銜紅一片明年花發莫東西還向荷花深處栖
人間不似荷花好莫使空梁有燕泥

合歡詞

郎種合歡花儂種合歡菜菜好爲儂餐花好爲郎
戴天生菜與花來作合歡配合歡復合歡花菜長

相愛

白蜺謠

南風起落蜺子生於霧成於水北風瘦南風肥厚
至丈取不稀殷勤祭沙渾莫使蜺子飛

連州灘謠

五里一峽十里一灘水如箭激石似弓彎
湟水灘難

食魚謠

鮠魚頭鯉魚尾鯪魚之腹更甘旨

水魴土鯽病人宜食魴浮鯽沉可以滋陰

黃白二花

黃花魚白
花魚也

味勝南嘉

寒鱖熟鱸既甘且腴
霜鱖雪螺味不在多

漁者歌

取魚大濫二濫捕鱖三沙四沙潮落不歸村舍月
明同宿蘆花

船公上檣望魚船姥下水牽網滿籃白飯黃花

皆魚

悲幽操

昊天嗟嗟兮何今其盲晝不見日兮吾無以爲光
夜不見月兮吾無以爲明昊天嗟嗟兮吾無日月
之照臨將與鬼怪而爭行長跪兮扶桑稽首兮東

皇願將日兮出東方有日兮自有月太陰兮白隨
太陽

割股操

爲母割股母啖而甘母則不苦母啖不甘兒將以
肉爲脯兒肉幸鮮兒心則腐一死可救母兮兒身
以之一嚙之肉兒安忍辭

二妃操

有序

二妃者一曰益陽王妃丁亥春王被害廣州妃
有殊色蕃兵欲逼妻之妃曰王故夫也亟具棺
衾殮王予將盡一哀以事汝兵從之妃多縛小
刀衣中整刃外向喪服哭泣視殮含既葬兵欲

家山言夕 五
犯妃妃大罵兵抱持益急身數千處被創血涔涔仆地妃乃反刃自殺

爲我殮王送之北邙誓將從汝不惜新喪王魄已歸土同穴終何補利刃懷滿身欲切奴爲脯奴血何淋漓痛楚莫予侮自剄以報王黃泉相鼓舞

一曰滋陽王妃王嘗與銅陵興化永豐信陽永寧五王客寓惠州庚寅夏六月廣州圍急有奉化伯黃應傑者與副使李士璉誘執王及五王以惠州先降旣而悉殺之以媚敵諸王子在襁褓及宗室女已嫁者皆死滋陽王旣薨妃某氏色美應傑將辱犯之不從羸其上衣閉室中妃

乘間析下衣爲縷經死

夫爲王妃是我皎如霜身可裸何必衣與裳禮義爲包裹天留一縷絲以爲絕命資徒勞強暴守蟬蛻不會知

四孝烈操有序

歲甲午西寧王帥師攻新會城閉八閱月糧旣盡守將屠居人以食有莫氏者諸生林應雒之妻其姑將就烹莫叩頭請代姑得釋而莫死有李氏者兵欲食其夫哭拜曰吾夫五十無子請食我兵殺之以首還其夫使葬焉梁氏女者其父諸生名學謙女年十一請代父亦死諸生吳

師讓妻黃氏亦代夫死是爲新會四孝烈

黑雲沉沉壓城隅城中食盡雀鼠無誰其死守右
骨都饑來膾人爲朝脯可憐窮窶三羅敷肌如冰
雪顏如荼再拜乞克君庖廚解杖請代姑與夫妾
年尚少甘且脆姑與夫老肉不如請君先割妾膏
腴味香不負君刀爰食之若厭飫願還妾頭願姑
老夫無子妾命敢踟躕有女年十餘緹縈亦不殊
哀求赴湯鑊保父千金軀保父千金軀泉下報章
渠無嫌女身小一飽只須臾須臾飽亦可章渠單
殺我天生嬌女身爲君供鼎俎

三湯操

有序

香山小欖鄉有諸生黃肇揚者其妻麥癸巳冬
被掠憤罵赴水兵捉其髮繫樓櫓間麥乘間斷
髮又赴水身沒復湧出作憤罵狀兵射之旣帶
矢沉又湧出兵又射如是者三乃死

入水不肯沉罵奴猶未畢身輕乘文魚三躍江中
出佳人一赫怒波濤爲羨溢饒箭雖紛紛難損之
蘭質去爲湘妃姊魂烈知無匹

三烈魂操

有序

三烈魂者一曰韓氏女初廣州有周生者市得
一丹縠衣置於牀側夜將寢寒帷忽見少女驚
問之女曰毋近我非人也生懼趨出比曉率閭

里來觀初聞其聲嬌啼幽怨若近若遠久之形
漸見姿首綽約陰氣籠之若在輕塵謂觀者曰
妾乃博羅韓氏處女也城陷被執賊見犯不從
觸刃而死衣平生所著故魂附而來耳衆乃火
其衣而祭之予聞哀之以辭曰

彼綃者衣兮水之不能濡美人之血紅如荼兮彼
衣者綃兮火之不能焚美人之心皎如雪兮毋留
我綃兮吾魂與之而東飄兮毋留我衣兮吾魂與
之而西飛兮噫嘻烈兮不自言之而誰之知兮

一曰湛氏女年及笄許字吳生丙戌廣州不守
女投井死生欲迎其喪歸族人不許有李氏子

者持正論告生生乃得迎其喪一夕月明李氏
子見一好女身被濕衣前拜曰妾增城湛氏女
父字翼卿非君執議游魂將無所依請賦詩以
志妾之死言畢而滅予聞撫琴爲之操曰

嗚呼噫嘻井之陰陰兮美人以其魂嫁猶不沉兮
匪一日之沉兮何以得君子百年之心兮謝君之
友兮以禮而合幽明之瑟琴兮

一曰蘇氏婦歲甲寅廣州有請覘仙者有自署
蘇氏者來問其誰書曰妾廣州繡花街人父字
明宇妾年十七爲汪季子妻庚寅城破奴殺夫
語凡擊奴奴破額因磔我死歌曰

擊奴擊奴奴雖不死已碎顱腦血可以濺吾夫纖
纖女手有霹靂泰山難與秋毫敵丈夫何必是荊
軻死爲鬼雄隨所擊

雙刃操

有序

有謝氏婦者番禺市橋人小名玉華同邑曹世
興之妻也世興卒謝氏誓不再嫁爲其父所逼
以刀自刎家人亟救之謝氏左手探喉右手引
刀再割而瞑凡二日不仆色如玉理其裝篋則
殯殮之衣皆具乃與世興合葬焉有某氏者南
海蘭石人夫梁庚寅冬聞城將陷某氏誓渙一
死其夫曰卿死吾亦不忍獨生某氏因取二小

刀一與夫一自佩久之兵至蘭石其夫被殺某氏殮夫既畢卽取所佩刀自割姑驚哭視其喉未斷欲取奇藥敷之某氏亟再割以死二事相類予合而以琴寫之

吁嗟烈兮佳人知義兮不知有身手持喉兮再割血灑地兮紛紛血灑地兮紛紛夜有光兮非青燐鬼伯抱持兮叩天閭

待舟操

有序

南海有某氏女者其父以許何氏之僕已而何氏以構訟破家因取所聘金於女父女父還金將以其女改字女陰使人語僕謂必無他志且

速之再納聘金僕貧倉卒未具會有以多金求女者女哭誓不從已而何氏僕持聘金至女父怒而逐之女乃潛出與僕相持痛哭約僕以舟來迎至夜女至江干待舟不至卽自經年十有五予以琴寫其悲辭曰

月將落兮潮水平舟不來兮傷予情獨立沙洲兮涕淚零無人知兮惟流螢水禽忽叫兮似人聲追者至今天欲明君豈忘兮不來迎妾若還兮亦不生掛榕枝兮心戰栗裙帶斷兮泥沒膝魂尋舟兮不見舟魂見舟兮妾願畢舟迎魂兮更莫遲波濤驚兮魂恐失

黃鵠操

有序

予有姬人陳氏從予遠遊道病死於漢陽未三月其所生之子阿遂行至舊京亦死年甫三齡臨危泣喚曰姨姨舍我予痛甚援琴爲操以寫其哀名曰黃鵠以擬古之別鵠辭云

黃鵠死不留雛母在荊江子在吳魂來將子入黃壚嗟乎黃鵠爾何愚留子與雄雄不孤雄不孤兮爾魂長依吾

前黃鵠兮不留女後黃鵠兮不留子同是嬰孩未有知泉臺相伴徒爲爾女有魄兮子有魂安得長隨黃鵠身吁嗟兮黃鵠恐汝復爲人

先是王孺人
華姜沒其女

年四歲亦繼
亡故及之

後黃鵠操有序

辛酉夏予長兒桂以患痢而沒其母故黎氏孺
人綠眉也綠眉生有美才能詩年長擇耦不嫁
舉姜旣沒予以禮求爲繼室事吾母夫人備極
色養和柔端靜吾母以爲賢沒後而阿桂鞠育
於吾母年及七齡從予自楚至吳往返數千餘
里能言其山川風土讀書歌詩作吳儂語音綿
蠻清婉以媚其祖母祖母憐愛有加於諸孫方
以爲晨昏娛笑之具皇天降毒一日又使天殤
死其身以死其母綠眉也嗚呼痛哉至是而綠

眉真死矣昔也舉姜亡而其女阿雁從之繼也
姬人陳氏亡其子阿遂亦從之今阿桂也於患
難流離十死一生之餘又復追從其母綠眉於
六年之前也嗚呼母終而其子皆旋亡豈皆以
予爲不德而不能有其子乎予自姬人陳沒嘗
爲黃鵠之操以寫其悲今而又不能已於過情
也亦姑援琴爲後黃鵠之操云爾

黃鵠兮汝本鳳凰毛羽麗兮多文章慕高義兮不
字盛年處兮閨房天作合兮咫尺忽與予兮頡頏
初筮得兮歸妹予亦憂兮承筐宜無實兮有實果
生子兮月望甫三齡兮恃失大母育兮無傷於爾

甘兮一味食必同兮膏薌夢當門兮桂樹子碩大
兮珠光以嘉名兮錫汝將見德兮芬芳幸黃鵠兮
遺汝命已勝兮率姜歲殷勤兮祭祀將邀福兮泉
壤魂有知兮成立魂無知兮天殤嗚呼兮黃鵠有
子兮汝猶不沒無子兮今汝其亡嗚呼有子無子
兮維予其皆不能忘

三黃鵠堂操

有序

予族中有女未嫁而其婿莫生死奔喪不返誓
于天以死守志其兩代姑亦皆早孀無子賴女
以養予旣爲柏舟說以示女復題其堂曰三黃
鵠堂以比古之陶嬰而爲琴操以寫其悲云

老黃鵠兮太姑與姑年皆耄兮無子與娛少黃鵠
今年始雛未成婦兮代子爲烏鳥朝反哺兮堂上
暮滴酒兮黃壚老黃鵠兮不幸兩早寡兮無夫賴
少黃鵠兮以未亡命寄手瓜兮織素爲舖噫吁嘻
門以內兮黃鵠乃有三兮何辜皇天兮仁物何黃
鵠兮偏孤

光福山中鼓琴爲曾仲子作操

上豈無天非君之天兮下豈無地非君之地兮君
之天兮在山之中金庭兮玉柱日月兮所通君之
地兮在水之內笠澤兮具區雷風兮所載雷以生
日風以生月君之心兮一日而盈一月而闕月以

成風日以成雷君之心兮一風而闐一雷而開君
今兮五十功名兮汲汲王貌兮未衰目猶兮點漆
天命兮當知年光兮勿失

結交操

吁嗟嗟我之與子交兮子如日兮月如我未望兮
而日在其右既望兮而日在其左左與右兮其皆
邇日以爲明離日須臾兮月誠不可日以月爲其
命兮日得月而天下有水月以日爲性兮月得日
而天下有火兩相濟兮以長生與天地兮不墮

四雛操

嗟四雛兮二男二女咸嬰孩兮無知未委兮其虎

與鼠朝無食兮酸啼數顙視兮筐筥爲廉士兮不
仁吾過高兮累汝彼墨台之殉潔兮亦薇英之獨
茹豈妻孥而同餓兮爲西山之土苴吁嗟乎膏粱
吾不知求兮文繡吾不知與徒著書兮滿家不能
易兮一肥羜旣遭時兮不祥分吾生兮終窶熬文
章兮爲糜是吾心兮所組化呱呱兮爲蠹魚飽六
藝兮以孳乳天下皆晦盲兮吾多學兮焉補欲號
泣兮困窮天地豈吾兮公姥彼鴟鴞兮肆虐將切
鸞皇兮爲脯返巖穴兮深潛與骨肉兮爲土已矣
乎孔雀愛其珠尾兮山雞惜其文羽寧網羅之見
罹兮不忍濡夫微雨

三疊泉操

有序

天下名山惟匡廬瀑布爲多若黃巖之布水鶴
鳴峰之馬尾水歸宗之玉簾泉康王谷之谷簾
泉九峰菴之馬尾水石門澗臥龍菴之飛泉凡
十有餘處皆奇瀑布也而三疊泉者昔人稱其
上級如飄雲拖練中級如碎玉摧冰下級如玉
龍走潭架空霆擊吾尤以爲匡廬之絕景云泉
下注於潭潭有大磐石予嘗坐嘯其上爰作一
亭於南崖以與泉相向名曰三疊泉亭又書太
白海風吹不斷江月照還空之句以爲亭聯按
山志稱三疊泉乃朱文公所闢文公初見此泉

嘗繪爲圖傳京師所謂五老新瀑者是也彼夫唐人若太白飛流直下曲江日照虹蜺與僧齊已只有照壁月之句皆詠黃巖之布水或鶴鳴峰之馬尾水耳卽如陸羽茶經亦僅言谷簾泉之美皆未嘗知有此泉蓋以此泉深隱五老峰之背九疊屏之側從空懸布凡作三級而下望之不見其端杪又當玉川門盡處其谷九疊其磴孤懸林密石巉人獸兩絕望之惟見嵐烟窈冥白晝常晦無所謂瀑布之影象也非如黃巖之布水鶴鳴峰之馬尾水獨露空中四無虧蔽從彭蠡湖中可望見其奔飛灑落之狀自非好

事者百計搜奇身至此泉之下鮮不以爲黃巖
鶴鳴峰之外絕無最勝者矣嗟夫天下惟高者
善藏深者晚出泉其有以命我夫亭旣成奉文
公畫像其中而援琴爲三疊泉操以落之

我觀泉兮下不在淵上不在天中不在五老之峰
兮大月之山然則泉安在兮蓋在乎吾心之玄玄
爲天之一兮其生泉也在於雷欲動而未動之先
爲天之命兮所以開乾人知其出於山下兮不知
其以吾心爲源夫以吾心爲源則無往而不在者
斯泉安必其下在淵而上在天中在五老之峰兮
大月之山

花下兒歌

客聞花下兒啼於兒懷中得片紙書兒生年月
日蓋貧婦弗能鞠養置花下冀遊人見而收之
棄兒花間妾身輕兒啼呱呱莫斷聲三朝有乳未
能飲遊人聞泣應傷情妾能生兒不能養花間會
有人來往桐花小鳳花爲胎花使生之葉使長取
兒且作小鳳看黃雀銜珠報不難牛羊昔日解腓
字仁人豈可無肺肝

抱松婦操

宣城某秀才婦未笄從姑避兵匿松下姑將見
殺婦亟出以身請代兵殺其姑而脇婦婦抱松

泣罵兵怒殺之三日猶抱柎不仆

妾身欲化作柎樹抱柎而死代柎蠹三日膠漆柎
爲身我寢矗立不崩仆龍鱗片片入凝脂作柎疣
贅無窮期乳膏下凝爲琥珀鬢髮上縈爲菟絲有
身不得代姑死哭作柎聲風雨起力拔柎兮一千
尺擊賊輕與蔗竿似柎兮莫作老龍飛妾與姑魂
長在此

紀歲珠辭

歛人某娶婦一月卽行賈婦刺繡自給以其餘
歲置一珠絲絲繫之曰紀歲珠夫歸婦歿已三
載啓篋得珠積至二十餘顆矣

新婚一月卽相別刺繡爲生望同穴歲置一珠貫
絲絲珠知歲月妾不知珠爲懊儂紀年物淚紅點
點成臙脂美目乃是珠母海孕珠大小含驚采鮫
人慷慨泣夜光爭似妾多明月在夫歸數數繫中
珠三十不足廿有餘珠少不足新人用留妾珠兮
在羅襦

菜人哀

歲大饑人自賣身爲肉於市曰菜人有贅某家
者其婦忽持錢三千與夫使速歸已含淚而去
夫跡之已斷手臂懸市中矣

夫婦年饑同餓死不如妾向菜人市得錢三千資

夫歸一嚮可以行一里芙蓉肌理烹生香乳作餽
餽人爭嘗兩肱先斷掛屠店徐割股腴持作湯不
令命絕要鮮肉片片看入饑人腹男肉腥臊不可
餐女膚脂凝少汗粟三日肉盡餘一魂求夫何處
斜陽昏天生婦作菜人好能使夫歸得終老生葬
腸中飽幾人却幸烏鳶啄不早

猿斷腸操

寇入徽州掠諸童稚有寡婦獨子被掠寡婦日
夜痛哭不食死

雌猿失子易腸斷一聲哭向秋天滿哀哀寡婦聲
與同膝下嬌兒抱未煖多日糟糠不下咽猿叫未

終妾已絕魂逐兒行秋復春妾今與兒爲一身兒
有死母勝生母得免湯火當黃巾

隄決謠

黃河滙淮泗入湖隄不能距口決數百里水頭
高數十丈

黃河口決數百里會泗會淮勢不止魚鱉爲人得
幾時復爲魚鱉大湖裏築隄不用費金錢天欲神
州成大川陸沈但得蛟龍喜不惜波濤百丈懸

蹈冰操

翁挈稚孫暮歸蹈河水行中流水裂俱溺死

翁莫蹈冰翁莫蹈冰黃河十月凍未成泥上滑滑

下未生骨狐尾重大不敢超忽翁與阿孫瘴瘵無
履轍中流俱陷苦倉卒貸粟不能且減二口奈此
黃頭兒寧死我衰朽家人哭但望歸雖有翁與孫
不能易升斗鄰雞未鳴村未吠狗婦子被髮沿河
走隄上問無人有人不言空搖手問取黃小狐小
狐跳躑揚其膊云翁扶孫肩孫牽翁肘所入坎窞
大如臼水闊須臾合已久哀哀哭至黃昏河伯笑
聲且吞蛟龍不忍食留翁腊待水龜明年三月來
招魂魂曰噫嘻孫尙存河伯念孫小育孫俾作魚
蝦或風豚

淘鶯謠代漁童作

水流驚莫淘河我魚少爾魚多竹弓欲射汝奈汝會逃何

爾逃河莫淘河爾淘河一日使我三日魚不多養魚在領下不食奈魚何沒水取魚好慎莫竭我小盤渦

吁嗟淘河魚奈爾何魚師不畏畏爾淘驚爾浮少

乃沉多吾將廢網罟與爾隨流波取魚爾頤下殺

汝祭蛟鼉

淘驚一名水流驚亦曰淘河其曰逃河

下有皮袋嘗盛水二升許以養魚或竭小水取魚頤下食

薏苡謠

食米得薏苡一米二從郎二米儂只一薏

檳榔謠

一檳一榔無萋亦香扶畱似妾賓門如郎

晉布謠

以晉爲布漁家所造著以取魚不憂風颶

漁謠

鱔多烏耳鱗盡黃膏香粳換取下爾香醪

食檳榔謠

檳榔白不食花食花蒂當靈茶檳榔青子初成食
青子當茶清

歡口檳榔花儂口檳榔子花香子不如子甘花不
似甘香得相同何必求連理

將愁更滿茫茫直與長天遠
已過清明風未轉
妾處春寒郎處春應煖枉作金爐朱火斷水沉多
日無香篆

減字木蘭花

春山如笑笑向江波清處照雨淡煙濃一半還含
仙女峰無窮綠樹不待斜陽天已暮漸遠鄉關
回首東樓雲外看

戚氏

徐太傅園感舊

是青溪一曲流水遶平堤古木過城亂花飄徑使
人迷淒淒問蒿藜東園不見暮煙低當時玉輦曾
駐向此垂釣樂忘歸錦鯉三尺中涓爭買重勞御

手親提愛張星墓左南部妖麗全勝雲西榆柳
尚有烏棲清露咽咽怕向白門啼鍾山好雪餘佳
氣掩映斜暉逐花泥咫尺舊院芳畦脫寇往日名
齊豔魂不散總作流鶯一半分與棠梨太傅風
流甚池多畫舫洞有飛梯喜得君王麗曲舉樓臺
一一乞畱題樂工老頓新翻女真雜調亡國多淫
靡教內人朝暮長流涕將往事思寫悲悽奈禁林
朔馬方嘶又彌望毳帳繞青甓更秦淮畔殘紅片
片只襯香蹄

武廟南幸有樂工頓
仁從駕自稱老頓

滿江紅

采石舟中

苦憶開平驚濤裏石厓飛上恨長江中斷天門相

向形勢依然龍虎在英雄已絕樓船望敎祠宮日
夕起悲風松楸響臨牛渚停蘭槳月未起潮先
長但通宵慷慨誰聞高唱蠻子軍從南岬成名王
馬向中洲養任幾羣邊雁不能棲蘆花港

金縷曲

舊院

淮水秦時水接青溪煙波九曲影含蒼翠一代紅
顏曲中盡猶記金陵四嫩有阿馬班如堂裏蘭艸
枝枝薰賦客鳳凰毛一半分沙喜無數女碩箋紙
歌樓舞榭今餘幾只桃根當年渡處尙餘香膩
三摺畫橋依然在踏斷長憂朔騎又惹得鴛鴦驚
起明月小姑來復往鼓笳篴楚調應相倚魂縹緲

欲招爾

阿馬謂湘蘭也工畫蘭能詩沙喜亦有文辭

花犯

出胥口作

是夷光茫茫直向三江五湖處大夫相與任白鷺
鴛鴦煙外毛羽洞庭七十峰如許芙蓉能見汝林
屋月白雲相逐飛過天際樹胥魂不返愧教他
銀濤十萬頃隨潮東注香采後梧宮覆芋蘿無女
應相勸子皮竟遜莫漫把千金仍廢著正好用計
然遺策飄然辭相去

揚州慢

螢苑煙寒鴈池霜老一秋嬾弔隋宮念梅花小嶺
有碧血猶紅自元老金陵不救六朝春色都入回

中剩無情垂柳依依猶弄東風 君臣一擲蚤知
他孤注江東恨燕子新箋牟尼舊合歌曲難終二
十四橋如葉笳聲苦捲去匆匆問雷塘燐火光含
多少英雄

太常引

隋宮故址

垂楊幾樹是隋家欲問後園鴉飛過玉鉤斜拂片
片風前亂花 紅橋流水穿橋廿四流盡舊繁華
把酒坐晴沙且數數春人鈿車

滿湘神

零陵作

瀟水流湘水流三閭愁接二妃愁瀟碧湘藍雖兩
色鴛鴦總作一天秋

瀟湘二水相合名鴛鴦水

又

瀟水長湘水長三湘最苦是瀟湘無限淚痕斑竹
上幽蘭更作二妃香

又

瀟水淡湘水淡雙雙流出逐臣心瀟水不如湘水
好將愁送去洞庭陰

念奴嬌

潼關感舊

黃流鳴咽與悲風晝夜聲沈潼谷天府徒然稱四
塞更有關門東束未練全軍中涓催戰孤注無邊
腹閬鄉秋蚤乍寒新鬼頻哭誰念司馬當年魂
招不返與賊長相逐麾下興平餘大將難作長城

河曲朔騎頻來秦弓未射已把南朝覆烏鳶饑汝國殤今已無肉

滿庭芳

蒲城惜別

金粟堆邊冰蒲水畔紫駟迢遞迎來月中驚見光
豔似雲開桑落霑人半醉將長筵弄向秦臺天明
去鞭揮岍曲愁殺渡人催徘徊空嘆惜桃花易
嫁鳳子難媒和香雨氤氲飛作塵埃墜井銀瓶永
絕誰復取仙液盈杯應知爾三春繡閣幽寂委蒼
苔

紫萸香慢

代州九日作

內三關胡門偏險尙餘趙氏長城愛雲中秋色欲

移帳出龍庭正值重陽佳節有樓煩山戍畫鼓爭
迎聽扶南小曲口外兩箏人教莫憶故園乳鶯
邊聲萬里相驚誰聽爾不傷情恨橫磨大劒長驅
突騎雄志無成一天羽毛飛灑卻空羨郅都鷹儻
駝酥更傾千盞一秋沈醉忘卻欲射妖星弓矢散
零

又送雁

恨沙蓬偏隨人轉更憐霧柳難青問征鴻南向幾
時暖返龍庭正有無邊煙雪與鮮飈千里送度長
城向并門少待白首牧羝人正海上手攜李卿
秋聲宿定還驚愁裏月不分明又哀笳四起衣砧

斷續終夜傷情跨竿小兒爭射恁能到白蘋汀儘
長天遍排人字逆風飛去毛羽隨處飄零書寄未
成

蘇武慢

雪壓天低雲隨山斷咫尺長城無影新魂哭月古
血凝冰沙際至今微冷捲葉鳴鳴未秋吹起霜風
鷗翎頻整望白登臺畔國殤何在在人頭嶺憶
子卿壯歲辭鄉暮年歸國漢氣千年猶勁青弭易
語白雁難通天使烈臣長命手執刀環淚和酥乳
淋漓臨分莫贈嘆多情依戀河梁還餘好詠

八聲甘州

榆林鎮甲諸忠烈

大黃河萬里捲沙來沙高與城平教紅城明月白
城積雪兩不分明恨絕當年搜套大舉事無成長
把秦時塞付與笳聲最好榆林雄鎮似駱駝橫
臥人馬皆驚更家家飛將生長有威名爲黃巾全
膏原野與玉顏三萬血花腥忠魂在願君爲厲莫
逐流螢

榆林鎮寇號爲駱駝城馬見而畏

淒涼犯

再弔榆中忠義

榆谿瀾瀾榆臺下潛流塞外千里風沙亂攪渾河
同濁劍花難洗牛羊飲水帶人血臘脂淡紫念當
年延綏將士三萬委泥滓憑弔駝山下酹酒黃
狐莫穿蒿里淚痕溼處教無窮白楊花歿更恨叢

祠與飛將而今未祀問秦弓可尙在否在媚子

百字令

柏林寺內有唐晉王祠弔之

誰家香火說同光年代鬪雞兒作三箭如何一
箭不記彌畱遺託聚鞠新場射鴻高磧天子誠多
樂龍餘獨眼有靈雙淚猶落長恨水自滹沱山
連勾注萬里無戎索手啗羊酥恩未報十六輕捐
雲朔紫兔霜肥黃鷹風激懶把秋弓拓日斜迴馬
舉杯聊自斟酌

長亭怨

與李天生冬夜宿雁門關作

記燒燭雁門高處積雪封城凍雲迷路添盡香煤
紫貂相擁夜深語苦寒如許難和爾淒涼句一片

望鄉愁飲不醉壚頭駝乳 無處問長城舊主但
見武靈遺墓沙飛似箭亂穿向艸中狐兔那能使
口北關南更重作并州門戶且莫弔沙塲收拾秦
弓歸去

浪淘沙慢

綏德秋望

塞門近西風乍捲片片沙起吹作龍鱗萬里河吞
倒入地底欲飲馬榆溪無滴水更無定凍解全未
向公子扶蘇墓旁坐天寒苦難已 遙指潰城半
壁凝紫與寸寸長蛇常山勢斷續無首尾嗟地脈
徒傷亭障難恃築愁好止教漢家頻得烏孫佳壻
枯蛻茫茫連天白霜華溼戰聲易歿濁塵外牛羊

來互市恨飛將腐肉成冰魄未冷天鷺掠去弓和

矢

一作骨

消息

應州道中

霸氣沙陀至今尚記晉王興處渾水東環桑乾西
繞總貫長城去不甘龍磧遙連鳳闕一任紫埃爲
主怕胡鵬車輪兩翼欲銜上白楊樹青艸明妃
黃花主父毅魄未成塵土獵得沙雞烹來半翅醅
酒眞憐汝襲秦才疎和戎命薄涕淚空然如雨迴
鞭好紫騮尙識雁門去路

蘭陵王

雲州旅次

大同破猶記姜家作禍藩王邸邊艸上牆紫兔黃

牛嚼花朵葱香雪餅大圍坐雙姬泥我琵琶弄爭
唱玉郎道是西宮內人作 康陵舊經過有五里
鵬旗三里龍舸豹房親上葳蕤鎖愛賈屋妖冶雁
門粧束金元雜劇教婀娜欲迴輦無奈 烽火御
樓墮任馬踏含桃人摘蘋果槐龍陰煖花當臥怕
對對悲策叫雲相和淒酸難聽語客去及蚤箇

意難忘

自宣府將出塞作

山轉雲中問花園上下蕭后遺宮鴛鴦雙灤在木
葉四樓空洋河雪紆干風愁不度居庸恨一春戰
雲慘淡直接遼東 揮鞭且莫匆匆愛笳吹兜勒
邊女唇紅駝鞍眠正煖馬乳飲還濃休出口奮雕

弓更奪取胡驄料數奇徒然猿臂白首難封

滿江紅

山陰道中

咫尺陰山黃水外龍堆相接最愁見邊雲羣起牛羊無別白艸已將青艸變平城叢與長城沒倩蘆笳吹出漢宮春梅休折天斷處沙如雪天連處沙如月總茫茫冰凍未秋寒微柳未成條風已斷鶯將作語春頻歇勸行人莫滯紫游韁教華髮

多麗

春日燕京所見

正春晴畫鼓天街無數玉河橋杏花盡吐八旗人至如雨更通城紫駝細犢逐盤頭蠕蠕公主錦剪圓襟珠圍纖袖漢嬌蕃豔對傾駟乳御渠畔暖風

飄柳一一作香絮施紫帳三絃四板學唱金縷
又三里豐臺芍藥玉鞭鞭馬爭去插雙雙翠翎年
少丛向啼鶯最多處柘彈穿林花氍毹鋪地壚頭都
解女真語恨斜日上林煙暝蒼翠欲迷路牛羊氣
吹滿鳳城總作香土

關河令

延綏清明有見

柳毛爭插正冷節向野墳相識枉踏新青蘼蕪殊
未碧黃沙遙接塞北但幾點紅藍顏色鹵地佳
人臙脂嫌太溼

傳言玉女

紅蕖

葉葉抽心卷放總同菡萏吹開無力笑春風淡淡

紅蕾太赤莫是榴裙相染光生雲髻冷侵冰簾
一半含胎乍聞雷吐復斂露華寒滴喜綠天半掩
銅瓶養取變作淺黃猶豔教人那不遍栽窓檻

瀟瀟雨

范黃

無端窓外種惹淡秋不斷雨聲來更朝朝暮暮一
心未展復一心開葉葉雖乾不落更助竹風哀蕭
瑟誰能聽月下徘徊且喜抽花豔甚似芙蓉千
瓣一夕驚雷有灑灑露滴堪取入瑤杯成香牙得
霜方熟與蒲桃顆顆浸春醅綠天裏攪淒涼但自
玉山頽

香牙乃代失
子之名

憶漢月

瓶中桃花

白碧紅緋相向春在瓶中嬌養枝枝不必翠林旁
自有雨情煙狀佳人金屋少空絕世有誰幽賞
一根一葉已傾城迎爾那辭蘭槩

減字木蘭花

新荷

荷錢好大欲買鴛鴦三兩箇未得團圓已有明珠
顆顆懸銀塘漸煖魚爭岸離不遠莫損新芽
食得魚肥是落花

念奴嬌

荷葉

穿波初葉似錢時已有明珠無數紅白難知那一
種解爲佳人先吐白鷺東西紫鴛南北爭戲田田
處香羅全展摘裁裙子應許記得西子湖邊冰

蟾已上猶唱菱歌去欲取絲絲纏玉臂那管芙蓉
無主斜倚冰盤靜搖風佩誰識蓮心苦團圓須蚤
冷飈容易侵汝

暗香

蠟梅

北枝花後又蜜脾點點成葩如豆想是綠珠拋向
柔條被黏取分得黃檀色淺吞還吐微開香口向
葉底朝暮衝寒攀得帶冰溜心幼被春逗莫只
管半含似他紅蕊露乾雪皺餘氣箱奩尙穿透愁
絕靈娥在遠思寄去百房能否蜂釀罷芳未淡且
浮臘酒

郭璞蜜賦靈
娥御以艷顏

疎影

鴛鴦梅

層層作蕊更絳趺一一結雙子定是青陵魂入
寒香催教采采車里雌雄不少相思樹又恁得同
心如爾更愛他飛雪丹成灼灼杏葩難似堂上
鴛鴦慣見試將七十二來與相比臉際凝脂絕勝
明霞幾片天邊初起枝枝止發臺關驛染遍了白
鵬頭尾記昔年弄玉同攀笑向影邊斜倚臺關有紅梅驛
羅敷嬌瓶中紙梅花
瑤華先吐嬋娟手白繭生髮不界烏絲細作春光
下剪遲冰綃片片那能似似得霜肥香動南枝
兩雨同心照水時

又

錦江滑膩層層染半寫香奩不用花纖多少春光
在玉纖枝枝剪出皆檀暈一朵先簪粉印微霑
翠羽教他盡欲銜

浪淘沙

春草

嫩綠似羅裙寸寸銷魂春心抽盡爲王孫不分東
風吹漸老色映黃昏
蝴蝶不畱痕飛過煙村紅
藏幾點落花魂雨過苔邊人不見溼欲生雲

憶王孫

草

風吹一夜卽萋萋未到裙腰路已迷腸斷離人日
向西帶香泥狼藉春光任馬蹄

惜分飛

事到傷心無可訴花落從他滿路此恨非風雨東
皇自是難爲主片片隨波無一語化作浮萍自
取應識相思處莫將香夢東西去

浣溪紗

不折蓮莖不見絲絲長難繫一相思飛過煙樹少
人知心似芭蕉抽未已雨聲偏滴半開時郎邊
可有一枝枝

相思
鳥名

又

一片花含一片愁愁隨江水不東流飛飛長傍景
陽樓六代只餘芳艸在三園空有乳鶯留白門
容易白人頭

又

不分桺煙花雨暗將春去歌慵笑嬾向花朝恁得
似鶯多語最恨匆匆神女彩雲無主巫峰十二
已迷人更一片香含霧

荷葉杯

紫燕雙雙飛去何處憑爾寄相思無書只有一紅
絲紅是口邊脂郎問玉顏消否如舊獨宿繡房
淡牀間畱得鳳凰琴淚溼不成音

念奴嬌

食檳榔

重重萋葉又柳心一片穿成雙蜨灰襟烏爹添莫
少要取津紅如血棗子皮甜玉兒心白細嚼成瓊

屑妃唇甘滑帶脂安得常嚙 中酒更進金杵兼
揆紅袖香愛氤氲絕玉女天漿如水湧渣滓教君
都咽紫穗三花綠房千子會向朱厓掇園園都買
不愁黎女來奪葉子玉兒
廣韻名

沁園春

荔子

夏至初丹喜有蟬催響遍桂洲正丁香大小爭銜
紅翠明珠的皦半擘浮丘膏滑難濡綃輕尙汗一
一先教雙掌畱妃唇嚙笑玉漿四注甘入心流
擎來蚤已蠲愁更挂綠離離堆滿簞愛肉芝成水
無勞艸汁露華可醉不用花癯畱齒何曾含消絕
似解渴須從隼核求酸還好自清明過後餐到淡

秋

掛綠乃荔
枝第一種

荔支香近

入手離離如火成
煖玉千顆萬顆燒天砂
作芙蓉熟盤中教注寒泉
盡帶鮫綃浴滑膩一點
昭儀不霑肉諸貴種先
數得增城族遍體鮮紅
微挂一條官綠乍解羅
襦玉指纖纖忌相觸消
受長憂無福

惜分飛

紅豆

開盒愁將紅豆數
滋味應知帶苦泥
裏休拋取怕他生作相思樹
珠淚何年頻化汝
顆顆盤中不住欲付黃鶯去
天涯銜向多情處

玉團兒

白杜鵑花

春心傷盡啼無血，化爲花枝枝似雪。色已瑤姬魂猶望，帝長含霜月。紅顏一夕成華髮，笑冰姿、脂盡脫。暮雨蠶叢朝煙，劒閣誰憐，淒絕。

醉蓬萊

落花

問流鶯何事，只管聲聲與花淡。語花落休多，令流鶯無主。多謝東風吹來紅片，染一園朝雨。拾得香魂，乳泉三浴黃沉薰汝。更用哥蜜古襲三兩瘞，取殘英帶絲連絮。大石樓邊有麻姑粧處，紫鳳青鸞盡教銜玉造。美人香土一卷金荃，兩枝瑤管，殉君應許。

摘紅英

落花

朝煙泣暮煙溼飛飛爭向鈎簾入收香蛻兼紅淚
煎取黃沉貪驚精氣當堦立春纖拾露多不惜
沾裙褶游絲繫風搖曳裙可畱仙月華多製

一叢花

燭花

初如金粟一絲懸漸似玉芝鮮風吹忽變芙蓉朶
喜心小不作青煙春色泥人殷勤竝蒂膏火莫相
煎難明不必恨秋天自有夜光妍淚珠滴滴成
紅豆欲穿起寄與嬋娟山遠路長因君報喜泣盡
復嫣然

鳳樓春

燈花

細小亦芙蓉千瓣玲瓏透心紅花頭還學綠雲鬆
餘蕊外綴金蟲莫使暗風驚淚落教繡幙重重
鳳樓東春色熊熊一邊雖施一邊猶蓄蘭膏依戀
缸中喜作爆聲朱火吞吐一叢叢金錢休卜人至
臨叩

向湖邊

采萼

積雨初消湖波新漲葉葉乍浮還沒素手牽來比
銀釵光滑教越娘輕按蘭橈菱花畱取莫與紫莖
同擷隔宿還肥浸寒泉似雪旋下蠻薑半作香
羹啜誰復忍去去和鱸魚輕別鱸具多攜更吳淞
乘月況美菓千頃非錢買休還恨犀筯玉盤消息

絕且逐鴛鴦向夕陽明滅

八寶粧

孔雀

生長瀧西鬱雞諸族可有孔家金翠宮錦連錢千萬箇欲作鸞皇猶未春來花與盛衰大小珠毛成屏還要遲三歲半段恐遭人射看場休至彈指更用佳人舞衣細拂盡教搖曳開尾總憐惜茜裙綵袖與朝夕廻旋相媚對嬌影雙雙欲語月明忌向花中睡笑檻外朱鷗多驚不識情滋味

玉女搖仙佩

白鵲鵲

西洋巨舶蠓鏡蠻奴帶得雙雙純白膩粉粘身金絲生頂慣自開花娛客不用春纖拍喜畚言漢語

諸音都習教兒女珠釵買取好把餘甘綠豆相識
離籠恐天寒覆被薰香殷勤旦夕東屋漫誇五
色黃裏紅衣爭似冰翎霜翮卻笑越鵬長矜瓊尾
尚有絲絲煙墨未盡瑤妃質恨天與慧性年年添
得祇自記華清舊事宮人教謝至尊憐惜無消息
襟前但有淚痕積

浣溪紗

杜鵑

血灑春山盡作花花殘人影未還家聲聲只是爲
天涯有限朱樓當鳳闕無窮青冢在龍沙催歸
不得恨琵琶

阮郎歸

燕

雙雙剪水鏡湖旁
萍開一片光
游魚正繞紫鴛鴦
輕銜過夕陽
新月上素琴
張窺人在畫梁
巢中多少落花芳
成泥更有香

釵頭鳳

收香鳥

春毛靚黃茸
映聞香不覺
花開頂爐煙大舒
翎待水沈魂氣
那飛簾外在在
長垂影雙雙
竝心香吞吐
香爲命浮瓊海
明珠買桐花生
長美人簪戴
愛愛愛

又

當釵立花慵
拾倒開紅羽
雙煙入沈馥
氣成心字
氤氲終日不
離香翅戲戲
餐瓊粒人相
習不

樓枝上愁花溼銅鑪器添蘭桂殷勤么鳳口珠銜
媚記記記

桂枝香

柳

殷勤八跪但暮送潮頭朝迎潮尾正值沙禾始熟
競銜雙穗黃膏四角隨圓月任雌雄入秋皆美虎
門船返兩籃紫甲一筐紅蛻况濫口河鮑大至
被生釣千頭腥吹墟市多謝魚姑肯賣百錢隨意
更纖手細將香稗丛霜螯對對穿起急歸烹取蘋
花淡處濁醪相媚

又

菱塘北角笑春蛻未肥秋蛻方軟才是禾莖露冷

荻花霜煖膏成。橈子筐筐足。把玄黃月明同滿。虎頭潮退。篝燈照取水邨。腥徧。喜更有金華火鑪。與海鏡。廿分河豚香亂。頻學芙蓉沈醉。不須人勸。漁家最好。真風味。就杓江蓴鱸。誰換季鷹歸未。秋來能到我家池館。

虞美人影

素馨茉莉休分別。大小總如冰雪。朵朵開當明月。綵縷穿成結。因沾膏沐香逾絕。圍髻更教重疊。未曙花田親掇。要解郎心熱。

又

斷腸何必萋萋艸。一片落花堪老。試問郎邊嬌鳥。

啼得春多少 垂楊不把愁心掃
攀折畫樓難到 欲取相思燒了
紅豆憐他小

一落索

杜宇催春從汝莫催人去
人畱卽是好春畱更一
任風和雨 怕見游絲飛絮
爲伊無主落花爭似
淚花紅只滴在分襟處

鏡中人

本意 和吳湖州

暮如霜朝似雪長
玉顏相接形影可憐無別處
處同明月 郎愛人那愛妾
妾讓箇人清絕羅
袖爲伊開笑靨更使能言說

鳳凰臺上憶吹簫

至自榆林迎歸荔浦人看秦地佳人正寶箏調月
瑤管吟春忽爾風吹花陰連嬌女共化珠塵會無
語匆匆入月渺渺行雲紛紛淚飛似雪揮不到
黃泉霑爾羅巾恨畱仙難得空縐裙裙欲託哀蟬
落葉爲傳此魂夢氤氲光離合非耶是耶髣髴誰
親

彩雲歸

羅浮女士本仙靈折梅花降我沙亭是綠毛倒掛
麻姑鳥身變化羽服猶馨文章好玉樓頻召遽飛
歸杳冥一自月沈雲散繡閣空扃心驚蜉蝣旦
暮在紅顏更易凋零別來但苦鸞鶴清夜叫斷煙

汀剩得伊瑤琴大小鳴咽誰忍成聲還腸斷出腹
嬌兒又委郊垌

雨中花

大別山前人大別芳艸裏新墳如雪宿蜨休飛啼
鵲休去爲守松間月萬里樓煩來入越又相逐
煙波一葉魂傷湘纍淚沾秦女定作桃花血

錦纏道

示小姬碎寒

不使彈琴爲惜阿姑仙爪但簫聲倚風輕裊又休
成子朱櫻小短短桃花禁得春多少更羅裙許
長莫拖煙草露瀼瀼溼教人笑好日長描取曹娥
帖錦箋千紙點畫都娟妙

高陽臺

紅艸溝寒黃華峪暝頻驚雨雪當秋竝騎三雲雙
雙正擁貂裘嬰雛抱向雕鞍上指故鄉萬里炎洲
念高堂九子分飛饑鳳啾啾門閭倚盡因新婦
喜秦珠秀麗漢玉溫柔况有銀箏邊聲一一蠲愁
人間樂事天頻妒把恩情忽與東流恨當年月未
團圓花未綢繆

摸魚子

寄秀水周青士繆天自

記當年落花門徑峭帆三度來往分襟忽爾經離
亂且喜故人無恙心不忌涼月夜銜書數把朱鷗
放鄰姬兩兩恨嬉戲相違明馳負去畱爾在菰蔣

鷺湖好咫尺姑胥在望包山爭列屏障新詞多
少漁家子可有雪奴低唱三白蕩多巨口鱸魚
刺乘春漲何時見餉與范蠡香莼越王醉李置我
北堂上

唐多令

閩秀水朱竹垞寄靜憐詞

東短接西長晁家小巷香代州城最細花娘行四
更當年十四鴛水客作鴛鴦送出雁門旁踟躕
廣武鄉上琵琶絃更唱娥郎臂上不知朱十印可尚
在在紅囊

代州有東西二巷是平康里

點絳脣

愁逐春來那知春蚤愁還蚤一天煙艸只有愁來

道花落無多不用東風掃畱階好玉顏誰保一
夕枝枝老

如夢令

含淚相看上馬手執絲鞭難下魂作柳綿飛片片
粘人珠靶休嫁休嫁一任櫻桃花謝

謁金門

愁心亂亂似風花一片帶雨含煙看不見正當春
欲半更有淚飛知霰一夕江南都遍垂柳垂楊
穿一串游絲同不斷

夢江南

悲落葉落葉落當春歲歲葉飛還有葉年年人去

更無人紅帶淚痕新

又

悲落葉葉落絕歸期縱使歸來花滿樹新枝不是
舊時枝且逐水流遲

又

相別久空與夢兒親已恨花房雙燕燕還憎竹簾
一人人有淚溼紅巾

又

清淚好點點似珠勻蛺蝶情多元鳳子鴛鴦恩重
是花神恁得不相親

又

愁脈脈最是暮春初有夢花中爲蛺蝶無情月裏
作蟾蜍不寄數行書

又

紅茉莉穿作一花梳絲縷抽殘蝴蝶繭釵頭立盡
鳳凰雛肯憶故人姝

賣花聲

題鎮海樓

城上五層高飛出波濤三君俎豆委蓬蒿一片斜
陽猶是漢掩映江皋風葉莫悲號白首方搔蠻
屨大長亦賢豪流盡興亡多少恨珠水滔滔

賈趙佗陸賈舊有三君祠在樓左

又

舊曲中

桃葉渡東西白鷺飛低裙腰草長與橋齊一代曲
中人已盡剩有香溪脂水半成泥流入湖堤荷
花欲踏紫騮嘶燕子銜將魂片片可是溪閨

滿庭芳

奉答張桐君惠陽幕中見懷

堤接鵝城橋橫漁浦渺茫盡是春煙故人愁斷多
爲草連天誰料才華莫用空趨府蠻語年年懷人
句花中葉外多少淚光妍情牽教鳳子西從藥
市東至香田謾銜得相思一一紅箋此恨何時解
釋垂白矣猶自嬋娟明妃好胭脂未落青塚已淒
然

南歌子

耳墜雙珠重睂拖半月長未笑口生香更簪花一
朶斷人腸

又

額煖裝貂鼠頭高作鳳凰珠翠染花香卻嫌人說
道似吳娘

又

屐齒沉香結釵頭小鳳毛鬟溼桂花膏半粧猶未
就弄檀槽

又

雪粉茶蘼製花梳茉莉裝衣更盡情香消魂猶未
了向平康

又

珠淚成紅豆香心作彩雲
更好花薰倩誰遙寄
去桂林君

蝶戀花

春流未滿愁蚤滿滿到天邊
暮雨還添滿不識是
愁將水滿不知是水將愁滿
分付東風吹稍緩
莫使春潮只送愁先返
愁返江南人未返不如潮
水從今斷

明月棹孤舟

恁似桃花容易醉芳顏
揀一春憔悴怕見青山
芙蓉疊疊爲似箇人雲髻
點點襟前紅是淚浣教

去舊痕沒計乳燕誰家啼鵲何代忍說廢興詳細

淒涼犯

得舊部曲某某書

桂林舊部多年散監軍亦向農圃寶刀血繡花驄
齒長總歸塵土英雄命苦恨當日江山不取令三
千奇材號虎冷落盡無主回憶沙場上日日投
醪氣雄相鼓舊標在否幾人還錦衣歌舞報有戎
旗把書帛殷勤寄與念恩私兩載剪拂俾作翮羽

滿宮花

最相思樓上鏡長帶一枝花影嬌鶯定解夢湘東
不向畫簾驚醒淚染春箋紅雪瑩錦水桃花相
映迴文書就字斜斜念與東風教聽

攤破浣溪沙

莫怪匆匆是落花春來誰得久繁華蝴蝶不知寒
食後向誰家白髮自教成暮雪紅顏不解作朝
霞送盡多情江上客一琵琶

唐多令

魂夢滿江飛茫茫何處歸和煙雨千里離微芳艸
不知人有怨愁望處只萋萋不用接天低王孫
路已迷恨羅裙色映東西淚共風花相遠近烏柏
下覓香閨

桃源憶故人

輕煙漠漠春何處試問水邊風絮不分晚來疎雨

只共芭蕉語 愁將花信頻頻數 畢竟春深多許
莫遣流鶯催汝 一夕過南浦

柳梢青

點點相思落花排就更有長條半繫江南半牽江
北盡作宮腰 啼鴉只爲前朝幾滴血棠梨共飄
惱亂春山白雲愁暮明月愁朝

又

雙下雕鞍秦王故苑共倚欄杆玉豆傳心銀桃引
笑不怕人看 斜陽稍覺微寒回首去宮城上關
無限芙蓉因卿睂嫵不愛春山

夢江口

春望斷日夕倚粧樓江上春潮無信久春潮只在
鏡中流流作一天秋

離亭燕

漸到鷓鴣多處愁作一天煙雨芳艸可憐千萬里
長共夕陽無主且莫返鄉關已有斷魂飛去雲
際片帆難駐江上一竿誰許空妒白鷗來復往恁
得分他毛羽掩淚似春山終日濛濛洲渚

酷相思

待潮

沙口寒潮來尚來正天晚吹霜氣又蘭漿前頭黃
葉墜一片也離人淚兩片也離人淚
疊疊芙蓉
如有意每爲我添蒼翠把十樣蛾眉教盡記朝畫

也春山似暮靄也春山似

調笑令

花片花片化作蝶胥誰見黃黃白白爭飛飛逐春
人暮歸歸暮歸暮月向枝頭半吐

又

芳艸芳艸生向江南太蚤連天一片春愁不管王
孫淚流流淚流淚點點桃花又墜

又

邊柳邊柳生在雲西不久清明纔見依依八月枝
條盡飛飛盡飛盡未報閨人霜信

又

邊月邊月何用光爭積雪征人見爾生情爲似閨
中鏡明明鏡明鏡不得長含雙影

漁家傲

五五枝頭還十十前帆已共寒鴉集數點殘陽猶
在笠情悵悵秋蟲未夕紛相泣 朶朶漁燈含霧
溼風吹忽似流螢立幾道星光穿水入舟未及沈
沈戍影愁呼急

又

清明掃二配墓

雨過爭開山躑躅餘紅染得春煙足人共啼鴉何
處哭墳新築鴛鴦雨雨黃泉宿 淚似棠梨飛碎
玉桺條千縷情難續每恨生時多怨曲愁盈目藤

燕忍作羅裙綠

霜天曉角

道鏡

流塵久入點點殘脂溼鸞影至今猶在憑香霧掩
餘泣 獨立花半執月中追不及蟾兔料應相伴
桂樹下歛裙褶

女冠子

人日有憶

正月初七正是謝家生日秣陵時酌酒臨桃葉裁
箋寫桺枝 雙飛空似夢再見更無期化作煙和
霧不相知

又

望月

天邊月今夕爲誰圓鏡好不將心事照何如一片

盡含煙光沒海東邊 相思淚霑溼素華寒化作
蟾蜍棲玉殿嫦娥人笑汝孤眠寂寂桂枝前

生查子

淚點白紛紛飛去沾花葉一半作棠梨一半爲蝴蝶
腸斷玉樓人綠艸藏嬌靨歲歲未清明已有
春魂接

春草碧

傷雅女阿雁

雁門生汝因名雁抱上白駝鞍風霜慣行盡紫塞
長城邊女爭看與珠鈿憐惜小雛鶯啼花嫩那
畏臘月天寒炎洲路遠越鳥一雙雙南枝返天妒
人月頻圓簫聲忽使秦樓斷織素只三齡同命短

醉落魄

黃鸝弄舌枝頭啼得春光熱離愁不到郎邊說梅
子青青打起穿花葉棠梨著淚成紅雪爲儂銜
得胭脂血天涯報道情難絕願似沈香生熟都成
結

望遠行

一朶青山一朶愁飛瀑淚爭流夕陽更作一天秋
誰忍上高樓花已落不須春鏡臺交與流塵玉
顏難再是西秦魂夢且教逐行雲命薄古如此枉
用溼羅巾

歸朝歡

姬人欲易琴囊適吳興徐蘋村司業
以嘉興錦見賦并而受之報以雷葛

莞香並申小詞時司
業將還朝補官祭酒

綠綺雕琴囊已舊漢錦蒲桃何處有美人鴛水一
端來豔過茗上穿花縐剪成勞素手珠徽瑤軫長
消受謝徐陵玉臺好序不及此文繡兒女葛絲
挑出幼爲報襜褕頻織就莞中香角復奩珍鵠斑
一一兼金購共獻飛雪候要知絺綌能長久待歸
朝軟塵拂拭圖取冷風透

石州慢

爲百又三歲潘仁需翁壽

天與奇齡連閨算來剛百三歲神宗一代淡仁聖
子七朝嘉惠栽培一老問歷幾許流離能畱華髮
無蟬蛻日夕一藤簑少衣裳新製無計再逢明

世好把芳尊暗消悲涕休說昇平軒冕光爭門第
芝華采罷自有青絕春山娛人可比芙蓉髻笑我
學神仙尚流連妖麗

桂枝香

題潘氏莊園

山眉不斷與一帶暮煙乍近還遠更有獅洋潮水
入湖迴轉漁帆片片乘新漲愛梅林雪花晴煖柳
邊相送三沙紫蜨四沙黃蛺蝶及春開窓畱半扇
任白鷺交穿窺人書卷驚落雙榕細子飼魚肥嫩
須將舊釀離支酒沃鱸生冰縷霜片蕩舟迎我玉
人攜取醉聽鶯鶯囀

寶鼎現

壽制府大司馬吳公

蚤梅初吐香泛長至氤氲春酒賀亞相含元難老
滋潤東南膏澤厚似瑞雪自羚羊三峽是處炎荒
霑透致出穴嘉魚十里破凍來充籩豆 吐握公
旦今難覩儘人賢依戀裳繡傾四海朝宗節鉞欲
捲旂江歸大斗奮武烈與文謨千載銅柱重標嶺
右看白雉西屠再獻拜舞臺門恐後 幕內多才
新樂府饒歌齊奏願年年張仲留作堂前孝友請
燕喜稍聽絲肉福共康侯受教至道雙曜同流直
與天長地久

湘春夜月

又黃昏夕陽斜映湘陰可惜一片江聲都瀉作愁

心欲抱月光同臥柰月光如雪不暖香衾怕素娥
笑客殷勤玉指起弄鳴琴 楓林瑟瑟螢吹鬼火
葉助猿吟早掩船牕休更作楚王迷惑神女荒淫
雲朝雨暮斷人魂終古情深恨宋玉託微辭諷諫
風華寂寞誰與知音

霓裳中序第一

花殘委碧蘚恨殺紅深和綠淺香冷啼痕猶暖正
蝶影煙沉鶯歌風斷春歸難綬待與誰尊酒持餞
人將老玉顏未駐要把翠娥選 衰損求仙休晚
且導引熊經一轉須知來日苦短有墮馬擎杯舞
鸞弄管帝鄉應未遠早蠲愁荒淫不返從師去女

生相逐玉女一行滿

絳都春

麗妻趙女本酒泉麗質小字娥親陰市好刀磨礪
犀利鹿車中嬉春日日施紅粉捲幃人道佳人挾
長持短誅讎報父不顧嬌身遂殺凶豪李壽任
蛾眉濺血玉骨成塵孝媛帝憐香名人播已千春
曹娥與爾爭英烈更同緱玉芳芬子胥慙汝吹簫
一片苦辛

歸去來

詠雨中山

生怕春眉人見無物爲紈扇煙雨濛濛教遮面天
風外似花顫十二峯俄變笑神女楚襄空薦屈

流但使詞人羨荒淫好諷中勸

五張機

五張機千絲萬縷是相思春暖春寒郎不念任教
紅淚染成桃瓣點點污水姿

一斛珠

柳條休韞朝朝攀折誰能那翠睂春共青山鎖多
事嬌鶯苦向枝間坐落絮紛紛時惹我浮游未
化萍千朵嫌他雪點蒼苔破爲語東風吹向池塘
墮

河傳

杜宇何處聲聲淒楚濺血成痕猩紅染雨開落朶

采氤氲無窮古帝魂 君臣忽隔蠶叢路因情誤
故國茫茫失路恨年年寒食與野死重華總無家

憶少年

青青芳草青青楊柳青青山色愁人獨如雪爲多情
頭白 鏡裏桃花曾太赤更何時玉顏如昔春
光可長駐奈醇醪無力

一斛珠

鷓鴣催我未十里遲遲放舸愁心不逐風吹過落
花誰那偏向離人墮 欲掩雨牕當晝臥又前灘
狂濤聲作滿江漁子爭回柁白鷗驚破飛繞青山
箇

殿前歡

鷓鴣鷄爲誰啼殺夕陽西一聲聲迸思鄉淚霑灑
香泥茫茫客路迷煙樹千重蔽魂夢三春滯花休
豔豔草萋萋

高山流水

王惠州生日

一麾出守向南禺似坡仙處處西湖玉局是前身
炎方散吏斯須長庚客白玉仙儒神交汝相見羅
浮四百祕授陰符待蓬萊罷相把臂在虛無歡
娛褰帷且名郡當盛暑泛酌浮菰玉軫按南薰一
曲早慰來蘇沐清涼長在冰壺時飛嘯聲共驚泉
九十噴薄杉梧恁風流豈羨莊老與天徒

長庚謂白玉蟾

眞人使君善嘯
羅浮有瀑泉九十九

明月逐人來

芙蓉影

流光如水芙蓉初洗玲瓏影鏡中誰似露華沾濕
多半寒相倚甚處窺他新藥吹滿紅陰生怕梧
桐亂爾蕭疎處蛩穿未已素飈偏早催拒秋霜始
乍褪殷勤結子

風光好

荷葉

似田田似錢錢半作羅裙襯午眠綠香鮮雙雙
菡萏開花筆當蘭室小楷曹娥代答箋女書仙
錢錢幸稼軒妾皆因其姓而名
之並善筆札嘗代稼軒答尺牘

翻香令

香魂煎出怕多煙未焦翻取氣還鮮
玻璃片輕輕隔要氤氲香在有無間
堯中黃熟勝沉麝忍教持向博山燃
且藏取箱奩內待荀郎薰透玉嬋娟

醉鄉春

最好桂林香酒擎出玉杯纖手皎月下
豔花間隨意老人消受果羸二豪何有
天上酒星吾友解沈湎卽成仙醉鄉日
月誰能取

錦帳春

凍雪全融寒風半透正長至圍爐時候
念故園春早數枝當牖梅花開否歲暮
離家淒涼素手與金錯無緣相就向空
囊一哭淚滿衫袖祗添消瘦

賀聖朝

燭花莫剪隨開落況同心梅萼雙心花大一心花
小儘卿斟酌霜風不使穿簾幙怕芙蕖莖弱知
他多事更將膏火多澆春脚

惜雙雙令

蜨去遙來如有語愁脉脉無心聽汝血淚多如許
亂飛紅豆如紅雨驢中定長相思樹誰擊碎珊
瑚無數欲把絲千縷盡穿試遣鶯銜去

憶少年

蕭蕭秋雨蕭蕭落葉淒涼如此愁人欲歸去奈雲
山千里嘹唳邊鴻空羨爾任雙棲白蘋紅芷長

貧易飄泊把恩情如水

白苧

又淒涼上端水天寒獨宿家園正吐朶朶紅梅紫
菊苦饑驅向人求食愧麋鹿無祿爲沙田闕白露
秋分粘穀秋收又無雲子依稀一斛畱作糜芋魁
兼煮如肥肉空腹肝腸地錦咳唾天花不堪平
賣持作高堂水菽當此際蕭條有慚僮僕哀蟬咽
咽與悲絃不斷怨簫相續欲返巾車雪霰頻飛催
駕黃犢是處窮途老去還多哭

塞孤

送客出渝關

一聲笳送上盧龍道足裂長城霜草射虎石邊愁

滑倒嘶馬亂開關早猿臂將白頭閒魚皮女紅顏
老向穹閭且共歡好遙指鴨綠迷路與龍沙杳
古塔何時行到黑海連天那望曉休凍絕埋冰窖
紅鏽水點羊酥羝卧處尋乾燥鴈南時書寄安好

滿庭芳

贈桂渚羅叟

曲水穿林平橋架石數家可是先秦小園誰種花
落錦成茵竹粉乾含鳳尾松膏濕吐龍鱗遮亭畔
三株老桂釀酒最芳辛生津都蔗外香櫟佛手
丹荔妃脣更甜蕉作衣還用蕉身雪剖黃柑滿乳
霜收綠欖多仁場師好何人得似樂勝橘中人

風中柳

趁取花朝與客探梅光福恨橫塘千株未足北船
偎玉南船偎玉恁春情冷香中浴 峯頭白盡不
見髻螺青綠掃莓苔瓊英萬斛香涇三宿恍歷三
宿約笙歌總歸林屋

聲聲慢

青燐似雨白骨連沙吹魂最苦悲風怨殺將軍城
堅只要相攻分兵乳源無計令胡笳橫截瀧東抽
營遜委金吾花甲堆徧芙蓉 肝腦空膏綠艸恨
野田狐兔曾飮元戎幾度秋肥爰爰得脫雕弓鳴
鳴向人悲嘯眼迷離誰辨雌雄終射汝及豪豨持
薦鬼雄

醉紅粧

銅盤獸火熾香煤繞銀箏與金杯兩曹分射一鉤
來愁天曙角聲催風飄簾外雪花迴紫貂冷苦
相偎煖玉枝枝搔背好雙錦帶爲君開

憶舊遊

寄朱竹垞太史

記河陰祖帳廣武分襟列坐妖嬈未厭笙歌曲又
鞭梢北指京路迢迢鳳池伯轉供奉芳訊斷瓊瑤
恨駿骨初收蛾眉已妒忽墮雲霄相要待君處
是四百東樵七十西樵更好離支熟與玉杵堆滿
香柚甘蕉教伊素手分取金液酒中調縱美讓并
州花娘未必無姓晁

江城梅花引

黃花和我滿頭霜。怕重陽。又重陽。不分早梅還與
鬪寒香。老去看花如霧裏。被花惱。一枝枝。總斷腸。
斷腸。斷腸。苦參商。夜已長。天已涼。一葉一葉落
不盡。悲似瀟湘。那得羅浮清夢到蘭房。明月笑人
眠。太早飛去也。影徘徊。尚半牀。

瀟湘神

斑竹叢。斑竹叢。淚花成。暈綠重重。葉葉枝枝。因帝
子聲含。瑤瑟怨秋風。

山漸青

楓葉飛。柿葉飛。飛逐宮鴉何處歸。歸來玉殿非。

拔龍旂卓鵬旂獵火山山燒翠微牛羊蔽夕暉

洞仙歌

浮丘石上作

朱明牖戶是羅浮西麓地道潛通到句曲羽人家
石上掩映樓臺花木裏來往浮丘伯叔稚川曾
住此丹井珊瑚流出泉聲似哀玉社事待重開士
女西園金錢擲大家絲竹笑白髮穆穆上頭來却
不少詩仙暮年清福

南樓令

無奈葉蕭蕭未秋含素飈染霜深怎得紅消碧樹
無端成錦樹片片血作花飄寫恨滿空寥斷魂
何處招怎相思難報瓊瑤青女多情能醉汝休落

盡爲南朝

贊成功

堯城香角血格油沉收藏奩內女兒心買來薰被
費盡麝金雙煙繚繞又到春淡幾夜風雪飄灑
梅林偏愁凍殺綠衣禽一般雙宿忍使寒暗氤氲
雨翅覆爾蘭衾

驀山溪

濛濛細雨未冷難成雪幾日起乾風但慘淡吹黃
林葉玉顏憔悴無酒與芙蓉朝似日暮如霞紅作
胭脂妾鏡中人笑華肉無多血辟穀苦畱侯枉
萎落丹華燁燁英雄有恨白首事難成將好色當

求仙放誕過年月

解珮令

芙蓉不好荼蘼不好是桃花根葉都好來自秦淮
似比流鶯嬌小怎消他一枝裊裊 吳綾裁了越
羅裁了怕鴛鴦一對顛倒刺繡多閒儘一十二時
調笑寫蘭葩未嫌太少

虞美人

燈花並蒂紅蕖似博得佳人喜門簾盡下怕風驚
催把蘭膏添滿到天明 雙敲煖玉圍棋子賭取
枰花綺橫陳直待汝南雞纔上牙牀卻又月沈西

鎮西

邊風邊雨苦重陽寒絕教榆柳未秋無葉枝枝雪
趁胡鷹始擊代馬初肥禽鳴獸咽雲東雲西圍獵
向高闕相將蒙古部南飛倏忽更千羣錦袍馳
突女回鶻笑鞍捎紫兔箭落黃鵬腥臊自割臙脂
半霑鮮血

十六字令

花見爾如何不憶家花雖好爭似臉邊霞

金菊對芙蓉

本意

香沁疎籬菊英誰伴芙蓉千瓣含烟與鶯黃相映
弄粉爭妍朱顏一日能三醉向白衣笑更嫣然九
華佳色玉杯共泛不覺忘天折取插鬢翩翩向

酒家亂擲勝似金錢與新辭芳豔分付嬋娟長紅
小白同低唱更一朵當錦雙纏拒霜辛苦因公晚
景一倍相憐

花犯

恨炎天梅花少雪凝脂未肥白玉寒珠熱似倒掛
南枝么鳳無力故人欲寄春消息踟躕那忍摘怕
蛺蝶食殘黃蘗團香歸粉翼仙姿亦復苦愁侵
憐他消瘦甚神傷姑射膏沐少天然好免污顏色
飛瓊女月中不辨縞衣冷相要同片石喚翠羽啾
嘈歌罷天明愁寂寂

買陂塘

買陂塘半栽芹菜一冬香滿莖葉浮田更種南園
薤青與翠萍相接教弄楫須小摘田田未礙荷錢
疊鳬鷗亂喋怕瞋子拋來裙兒湔去搖動一天月
吳淞上聞道蕖絲最滑曾同吳女春掇鱸魚豈
似吾鄉好風味水芹還絕根似雪菹一半甘馨更
與苧蒿發金蘊細切作素饌伊蒲清齋樹下日夕
抱禪悅

又

買陂塘半圍楊柳荔支偏要臨水鴛鴦教向珊瑚
影看殺宋香陳紫當小至拋一顆遊魚爭咬揚冰
翅含霞吐綺把黑葉離離朱苞燁燁消受當芳餌

鳴琴去舟逐蘭苔翡翠匏巴機亦忘矣金盤玉
筯休相憶差與赤櫻相似君且止休釣國桃枝用
盡誰知爾皤皤奈此更酒浸芙蓉丹調茵芍笑逐
采蓮子

又

買陂塘水通珠海香螺紅蟹多有江瑤瑣珞爭膏
滑不向老漁分取秋漲後魚大上黃花白飯量同
斗纖鱗巨口向紫蓼開邊丹楓落處斟酌更杯酒
溪橋畔忙問花翁在否如今酣飲非舊吳酸越
辣多滋味方法早教山婦君擊缶歌莫輟河清可
俟須人壽疎星滿留正霜月流空暮天蕭爽嘯詠

莫回首

黃花白飯魚名

南浦

平沙雪積正層冰千里凍河流渾脫浮沉難渡泥
污紫貂裘繫馬苦投山戍望關門半掩武安樓喜
艸間麕兔健兒多射取醉豁邊愁卷葉更吹簷
栗向悲風驚起鬼啾啾酒長城枯骨尋取月氏
頭細小不堪丹漆任烏鳶銜去作高丘念國殤如
許未歸魂在白狼溝

惜黃花慢

易水弔古

送送魂銷正暮山淡淡寒水蕭蕭就車不顧勸觴
未醕悲歌變羽怒髮衝飈素冠賓客紛流涕白虹

貫斜日光搖怕過橋馬驚豫子魚怪王僚 夫人
七首橫腰正撞鐘御殿貢匣趨朝大王環柱美人
鼓瑟屏風奮越衣斷單綃未應豎子同生却漸離
好怎不相邀况素要毅魂費爾空招

雙頭蓮

京洛無歸傷萬里神州陸沉都盡英雄無分把壯
志銷向邊頭紅粉訣絕欲向蓬壺便成仙誰忍須
發憤白首飛揚爭雄一天鷹隼 狀貌尚似留侯
但秋來攬鏡微霜霑鬢年將耳順奈一片耿耿丹
心難燼且喜五色肝腸多文章膏潤還拂拭紫鐔
青萍休教血暈

輪臺子

粵秀山麓經故太僕霍公池館作

一片寒烟蔓草忍再弔沉湘太僕閨人共赴漣漪
不少珮環魚腹佳兒佳婦嬉嬉媵湘纍總作蛟龍
族想忠魂未遠尚抱烏號林中哭荒園咫尺朝
臺望龍馭水濱未復恨江山與金湯四塞難歸青
犢但玉殿虛無翠旗反覆化海思雲愁杜鵑啼相
續莫招魂持衣上屋想隨帝被髮天門哀訴身難
贖

雙聲子

甲東臯別業故址

漢臺南面越城東臂勝地曾作蘅臯湖通珠浦溪
連香谷花木一一分曹蘭亭幾度觴詠罷徒有蓬

蒿難陶寫把絲竹留教山鳥啾嘈 幸狐狸知謝

公白血珍同水碧金膏微軀安惜乾崩坤裂平陵

一灰鴻毛與龍髯馬角和糞土同委乾濠炊殘白

骨牛羊總成一片腥臊

謝公謂故督師大學士陳公子壯也

應天長

黃村探梅作

扶胥冬未半正百里花梅暗香相接生長瑤林兒
女一般如雪瓊英堆不掃任門戶玉茵千疊泥土
浣狼藉牛羊藻珠誰拾 多半化蝴蝶與翠羽翩
翩影迷寒月何必羅浮方得夢魂清徹師雄隨意
宿便此處美人尤絕休更待成子青黃始來攀折

眉嫵

新月

喜纖纖鉤掛淡淡痕生初試素娥手未作瑤臺鏡
娟娟影新眉隨意描就短長漫鬪想玉葱殊未消
瘦最堪愛宛轉畫樓前半規映珠斗仙樣唐宮
那有歎玉蜍獨處金兔無偶不歎雖偷藥淒涼甚
教人翻恨王母素娥未久更兩宵弓影全彀看三
兩天狼光墜貫他左肘

過秦樓

入潼關作

五谷三嶠函關天阻大河吞渭同流歎虎狼秦滅
但百二關山四塞空留守險少人謀把西京御氣
全收剩虛無宮闕斜陽千里隱映林丘喜峯陰
廟口琵琶女喚征人繫馬槐麴消愁教雨三鶯燕

各銜將紫萼亂作觥籌看白帝多情有明星玉女
綢繆且與亾莫問飛杖明朝雲外相求

柳梢青

三原春日

南北雙城梨花酒熟一路相迎蔬葉茵陳麪條蝴
蝶多謝歡情嘶花寶馬驕行白渠上交彈翠箏
處處鞦韆人人蹑蹻消遣春明

三原酒梨花春最佳

憶漢月

華山玉井間作

仙女洗頭何處廿八寒潭長去衣翻十丈白芙蕖
笑落一天香語多情應醉我斟滿了玉漿如乳
井中冰藕乞雙枝相逐要生毛羽

九張機

春羅蝶紅蝶白各花窠鮮花食盡難成繭何如蠶
子雌雄食葉三日卽成蛾

羽仙歌

七星巖好有玉屏遮道醉石橫空似人倒倩古松
扶起又花壓欹斜雲半墜知是酒星難老涼風
長繞樹黃葉蕭騷似有哀猿鎮吟嘯恨無人隨步
屨同上崩崖開鳳唳彈取箕山仙操問山鬼離憂
總爲誰與大小丁香向人含笑

霜天曉角

翠樓明月此夕應如雪三兩玉人相倚香露沁濕
雲屨一疊還一疊瑤琴彈不輟恨與素娥同寡

蟾兔外共寒絕

又

此情良苦況復瀟瀟雨長夜苦寒難睡蟲唧唧似
兒女歲去窮不去埋憂那有處白首不堪家累
無計甚向誰語

行香子

都門春遊作

花向東華柳向西華逐春嬉蠕蠕香車欲吹簫簌
先鼓琵琶喜人如雲酥如乳酒如霞西曲秦娃
南曲吳娃與流鶯婉轉平沙漸喧邊馬將宿宮鴉
過兔兒溝桃兒店月兒家

侍香金童

雪瘦冰肥淡淡含春色喜香暗清寒人未識蝶子
偷將新藥食剩粉殘酥爲留瑤席怕亂飛片片
隨風難自力更寄語多情休弄笛一朵鬟邊簪亦
得未許全枝玉纖多摘

淡黃柳

端州郡署作署會作行宮

蕭條郡廨曾作芙蓉殿誰記池頭蒙賜宴來去茨
菰葉畔長與君王舊鳬鴈共腸斷龍髯已零亂
剩垂柳欲攀徧御溝西可有殘紅片乳燕窺人但
銜春至巢向空梁莫管

一剪梅

胥口看梅

蕩漾漁舟胥口來湖上梅開山上梅開濛濛七十

二峰隈青失東雷綠失西雷 一夕夷光白髮催
香雪成堆香粉成堆風吹乾瓣作冰埃千片單臺
萬片雙臺

湖中有大雷
小雷二山